

ANSANM

POUR REFORM ELEKTORAL

No. 5 - 23 September 2011

Opposition Newsletter for the Boycott Campaign
of the October 1st National Assembly Elections

BOYKOT ELEKSYON

David Pierre ek son larzan

Seselwa in fini konpran byen menm ki foudre nou boykot sa eleksyon. Se sa parol ki tou dimoun pe koze ozordi e bann dirizan Parti Lepep ansanm avek zot partner David Pierre pe esey lager kont sa desizyon serye ki Lepep Seselwa in pran. Zot kasyet zot larzan e zot kontinyen bat latet dimoun, me selman tou levidans i montre ki larzan i an-abondans dan pos e dan kont serten dirizan, me kandida ek piblik pa ni menm arive santi loder sa larzan.

En Eleksyon Bat Latet

Ziska prezan napa okenn parti ki'n prezant zot program eleksyon. Napa en sel manifesto ki piblik in gannyen pou dir nou kwa ki sa bann dimoun i annan lentansyon fer pour nou pei. Zot koz lo nouvo Sesel ek proteksyon lademokrasi, me selman napa okenn parti ki'n met lo papye kwa ki zot anvi fer. Sel promes ki zot in fer avek serten dimoun se larzan apre eleksyon. Eski sa pa montre nou ki nou'n ariv en staz kot sa bann gran savan pe pran nou pour bann fou-bet? Alor se nou, lepep Seselwa ki bezwen remet keksoz drwat avek zot e fer zot konpran ki nou war tou zot bann zes e nou pou debout for pour nou gard nou dignite e ki nou annan respe pour nou lekor.

Reste kot ou ouswa gat ou vot

Mesaz i kler pour tou Seselwa ki annan laz vote: Pandan sa 3 zour eleksyon, savedir le 29/30 Sepetanm e le 1 Oktob, swa nou reste se nou ouswa nou desann e nou vot pour tou lede kandida e nou gat nou vot. Fer sir zot met en 'tick' dan bwat toulede kandida. Sa i ava garanti ki personn pa kapab zwe avek bann vot, me zot ava bezwen deklar li koman en vot gate.

POUR SESEL E POUR EN VRE
DEMOKRASI, NOU POU BOYKOT.



Garson David Pierre i fer en levantay biye 100 dolar e i met sa portre lo internet, me selman David i dir i napa larzan pou fer kanpanny e pour bann kandida PDM. Zize pour zot menm.

Boykot pou fer Demokrasi avanse

Lopozisyon lezitim dan sa pei dirize par Mr. Ralph Volcère, Mr. Philippe Boullé ek Mr. Wavel Ramkalawan pe diriz sa boykot afen ki nou demokrasi i kapab vin pli for. Nou pa enterese avek tit oubyen pozisyon. Me nou enterese avek en laplenn nivo kot tou Seselwa i ava ganny en sistenm elektoral ki drwat e alor nou demokrasi i ava vin for.

Nou pe boykot pour montre ki Mr. Michel pa senser dan son parol. Zis pran son deklarasyon lo SBC. I dir ki i promet pou fer reform elektoral e i bezwen en Lasanble pour

li fer sa. Eski pa ti annan en Lasanble ki Parti Lepep menm ti dizourd? Akoz i pa ti fer reform letan SNP ti anmenn mosyon dan Lasanble? Pa nou ti war zot pe vot kont sa mosyon? Zot war ki mannyer i bat latet?

En boykot pou fer lakominote enternasyonnal koz avek gouvènmman pou dir zot ki zot bezwen aranz zot. Parey dan bann pei parey Lalibi, Lezip ek Tinizi, bann gouvènmman Linyon Eropéen ek Lanmerik in entervenir, dan nou pei osi sa pou arive letan nou montre ki Sesel pa swiv bann norm enternasyonnal. En boykot pou ede fer sa arive.

En boykot pou osi vin en presyon lo gouvènmman limenm pou fer bann sanzman apropiye. Lopozisyon i pare pou partisip dan eleksyon si selman i annan bann lalwa ki drwat, ki rezis voter i balanse, ki larzan pa zouti prensipal pou aste vot, ki resours leta i ganny respekte, ki SBC i reprezant tou lopinyon. Letan ou boykot ou ava pe ede fer sa bann reform neseser.

Seselwa, loportinite i devan nou pou fer nou demokrasi avans enpe plis ankor. Sa sans i dan nou lanmen. Pour sa eleksyon swa reste se ou, oubyen gat ou vot. Boykot sa eleksyon.

Lepep 'A' ek Lepep 'B'

Mr. Michel i kontan dir ki personn pa pou anbet lepep Seselwa. Wi, le premye Oktob, lepep Seselwa pou montre li ki nou war kler e ki dan sa eleksyon ti senpleman annan Parti Lepep 'A' ek Parti Lepep 'B'.

Nou'n war sa byen menm pandan sa kanpanya. Napa en moman ki en sel kandida in koz kont lot kandida. Zot in plito evite kritik kanmarad, me selman zot pa'n mank en sel loportinite pou kraz vre lopozisyon dan sa pei.

Ou bezwen zis regard en kopi 'People' oubyen 'People Plus'. Dan tou lartik ou war non Ramkalawan, Boullé ek Volcère, me zanmen ou war okenn kritik lo David Pierre. Wa krwar se nou ki pe pran par dan sa eleksyon.

Seselwa, sa eleksyon in vreman vin en karikatir. Nou war 2 lekip dan menm tim pe zwe-zwe ek kanmarad. Sanmenm sa politik serye dan en nouvo Sesel? Alor, ou ki siport lopozisyon, ou annan zis en keksoz pou fer: Tenir lo ou pozisyon. Pa donn en vot Parti Lepep 'A' dirize par Michel oubyen Parti Lepep 'B' dirize par David Pierre. Boykot sa eleksyon.

Kandida PDM ankor pe esper Larzan

Apre tou sa bann lakizasyon kont lezot dirizan dan lopozisyon konsernan larzan, boul retour pe tap David Pierre ek Jane Carpin aplen. I kler ki tou sa bann promes larzan pour bann kandida vin debout pa pe ganny realize malgre lendikasyon ki larzan in fini rantre dan kont. Kandida i mekontan e serten pe menase pou retir zot kandidatur si larzan pa ganny verse avan eleksyon.

Problemm i vin pli grav letan bann kandida i koz antre zot e zot dekouver ki sakenn in ganny ofer en diferan sonm e ki serten in fini ganny pli gro bout ki lezot. Me en keksoz i parey: Pa zot tou ki'n ganny tou larzan ki zot ti ganny promet.

Parmi bann kestyon pli serye se kwa ki'n arive avek sa gro sonm ki'n ganny verse atraver en Noter baze Kingsgate

House. Sa 5milyon in sipoze fini rantre dan kont prive en sef, me zanmen sa larzan i ganny mansyonnen dan miting avek bann kandida. Kote sa larzan i ete?

Tou pe get kanmarad lizye kler parey sat ki pe vey lera e derye ledon napa kalite kestyon ki pa pe ganny demande. En dimoun ki parmi bann ki ekout telefonn bann la dan lapolis i dir ki i soke antann sa kalite konvèrsasyon ant sa bann kandida PDM. I dir ki size prensipal ki zot koz lo la se larzan. Lot keksoz ki sokan se lafason ki zot zour David Pierre antre zot deryer li.

Tou dimoun pe koz lo sa size larzan ki ganny mansyonnen partou. Kestyon ki zot pe demande se ki mannyer sa zafer pou fini. Sa ankor enn fwa i montre ki larzan in pran kontrol politik dan Sesel e ki vreman nou bezwen reform elektoral. Sa ti devret ganny fer par sa Lasanble avan eleksyon.

NDP, SNP ek Boullé : Vre Lopozisyon Sesel

Vre Lopozisyon dan Sesel reprezante par Mr. Philippe Boullé, Mr. Ralph Volcère ek Mr. Ramkalawan, ki ti ganny 45% vot dan dernyen eleksyon malgre tou bann trik i dir avek Seselwa pa bezwen ekout sa bann mansonz e tenir ferm pour nou fer avanse nou demokrasi. Pa les zot ganny enfliane par okenn sa bann parol enbesil ki bann parti politik pe servi pou bat zot latet.

Wi, se nou sa vre lopozisyon e menm Parti Lepep atraver Marie-Louise Potter in admet. I ti dir 'Boykot Lopozisyon e siport PDM.' Eski sa pa montre nou ki PDM pa lopozisyon, me ki se nou ki reprezant lopozisyon. Laverite i sorti dan tou fason.

PDM li osi i aksepte ki zot pa reprezant lopozisyon akoz zot admet dan zot program ki se lopozisyon ki pe boykot. Sa osi i en lot laverite ki sorti volonterman.

Seselwa, Parti Lepep ek PDM i menm zafer. David Pierre pe ganny servi pou lezitimiz Mr. Michel ek Parti Lepep. Alor tou siporter lopozisyon e bann manm Parti Lepep ki fristre, annou boykot sa eleksyon. Dan sa fason nou ava siport lademokrasi e fer nou pei avans devan.

Nou pei Sesel i bezwen nou. Ansanm annou pa les li tonbe dan sa moman kritik. Boykot e fer politisyen ekout lepep Seselwa.

Reste Kot Ou swa Gat Ou Vot